

Á Mesa do Parlamento

O **Grupo Parlamentario Popular de Galicia**, a través do seu **Portavoz**, ao abeiro do disposto no Regulamento da Cámara e de acordo coas previsións establecidas pola Mesa do Parlamento para o “Debate anual sobre política xeral: Comparecencia do Sr. presidente da Xunta de Galicia, para informar e debater respecto da situación política da Comunidade Autónoma de Galicia (doc. núm. 24009, 12/DEBA-000001) presenta as seguintes **Propostas de Resolución**

Santiago de Compostela, 24 de abril de 2025



Proposta de Resolución nº 1

XACOBEO 27

O Parlamento de Galicia insta á Xunta de Galicia a solicitar ao Goberno central que apoie a solicitude unánime do Parlamento de Galicia de conceder canto antes ao Xacobeo 2027 a declaración como Evento de Excepcional Interese Público (AEIP), que conta xa ca aprobación da Comisión Executiva do Consello Xacobeo e co visto bo do Ministerio de Cultura. Na mesma liña, instarase ao Goberno de España a un maior e firme apoio económico ante o próximo “lustrro Xacobeo 27-32” co fin de ter unha maior presenza nacional e internacional que sirva, como os xacobeos anteriores, como reforzo turístico da Marca España e Marca Galicia.



Proposta de Resolución nº 2

TURISMO SUSTENTABLE E TURISMOFOBIA

O Parlamento de Galicia insta á Xunta de Galicia a seguir desenvolvendo un modelo de turismo sustentable e de calidade que permita seguir incrementando o poder dinamizador e de investimento que esta actividade supón para a nosa comunidade e rexeitar expresamente actitudes de turismofobia baixo o convencemento de que toda actividade turística debe ser compatible coa vida cotiá dos cidadáns e co respecto á convivencia.



Proposta de resolución nº 3

REDE FERROVIARIA

O Parlamento de Galicia insta á Xunta de Galicia a que se dirixa ao Goberno de España co fin de demandar a posta en marcha das medidas e actuacións necesarias para a mellora da rede ferroviaria en Galicia e da súa conexión co exterior, con reclamacións como a designación dun interlocutor directo entre o goberno autonómico e Renfe; esixir que se solucionen as incidencias, retrasos e incidentes técnicos que se suceden nos servizos do eixo atlántico e na media e longa distancia; que se recuperen as frecuencias suprimidas durante a pandemia e aínda non recuperadas e tamén que se solucionen as deficiencias na programación e os tempos de venda de billetes na web que impiden aos galegos planificar as súas viaxes con antelación. Asemade, demandarase que se impulse e complete as infraestruturas pendentes e necesarias para o AVE entre Vigo e Porto, e a conexión de alta velocidade coas cidades de Lugo e de Ferrol, así como que se reclame a redacción dun verdadeiro, rigoroso e completo Plan director para a adecuación e mellora do Corredor Atlántico que conte coa colaboración activa das CCAA polas que discorre esta infraestrutura, cunha planificación real e detallada.



Proposta de resolución nº 4

ADMINISTRACIÓN LOCAL

O Parlamento de Galicia insta á Xunta de Galicia a contribuír á adaptación das entidades locais á nova realidade social, económica e tecnolóxica mediante a aprobación, no transcurso deste ano 2025, dunha nova Lei de Administración Local de Galicia e tamén lanzando un Plan de formación dixital para os concellos de menos de 5.000 habitantes.



Proposta de resolución nº 5

UPA

O Parlamento de Galicia insta á Xunta de Galicia a dirixirse ao Goberno de España para que rectifique a estratexia de redución de efectivos na Unidade de Policía Adscrita, así como actualice o catálogo de postos de traballo e a cobertura do 100% das vacantes do Corpo Nacional de Policía e Garda Civil e reclame un apoio explícito coa ampliación de horarios e operatividade dos cuarteis da Garda Civil nos municipios do rural.



Proposta de resolución nº 6

TRASPASOS COMPETENCIAS

O Parlamento de Galicia insta á Xunta de Galicia a continuar insistindo ante o Goberno central na ampliación do teito competencial naqueles ámbitos de especial interese para a comunidade autónoma previstos na constitución e no Estatuto, en especial a transferencia da titularidade da AP-9 e o rescate da súa concesión, a xestión do ingreso mínimo vital, o traspaso dos servizos de meteoroloxía e as competencias en materia de permisos de traballo vinculados a permisos de residencia, co fin de seguir avanzando en todo aquilo que poda contribuír a poder facilitar a vida das persoas que se despracen a Galicia.



Proposta de resolución nº 7

LITORAL

O Parlamento de Galicia insta á Xunta a que, unha vez se faga efectiva a transferencia de funcións, medios e servizos do litoral galego, de xeito inmediato, unifique as autorizacións e os permisos nun só procedemento para axilizar a tramitación para a xente que quere vivir e traballar no litoral, aprobe un Catálogo de patrimonio cultural do litoral, conecte mediante unha rede de sendas o litoral galego, cree unha guía para a integración dos establecementos hostaleiros do litoral e lance un programa para a recuperación de edificacións valiosas a nivel arquitectónico histórico e cultural nestas zonas.



Proposta de resolución nº 8

DEDUCCIÓN ESTUDANTES E ACOSO ESCOLAR

O Parlamento de Galicia insta á Xunta de Galicia a poñer en marcha novas medidas de apoio ás familias no ámbito educativo, a través da creación dunha dedución autonómica específica que lles axude a facer fronte aos gastos educativos do alumnado matriculado nas etapas do ensino obrigatorio, favorecendo a igualdade de oportunidades. Asemade, a Administración Autonómica promoverá a creación dunha Rede Galega de Concellos contra o acoso escolar, para seguir avanzando en centros libres deste tipos de conductas nos que o alumnado se poida desenvolver plenamente.



Proposta de resolución nº 9

INNOVACIÓN EN FP

O Parlamento de Galicia insta á Xunta de Galicia a crear a primeira rede de centros de innovación avanzada de Formación Profesional para seguir dando resposta ás necesidades das persoas, do territorio e do tecido empresarial, reforzando e potenciando a especialización, a innovación e a investigación aplicada para favorecer dinámicas de transferencia cos sectores produtivos.



Proposta de resolución nº 10

EDUCACIÓN INFANTIL 0-3

O Parlamento de Galicia insta á Xunta de Galicia a dirixirse ao Goberno de España para que cumpra co compromiso de colaborar co cofinanciamento do custe da gratuidade total das escolas infantís vixente en Galicia.



Proposta de resolución nº 11

SAF E DEPENDENCIA

O Parlamento de Galicia insta á Xunta de Galicia a que, no marco do proceso de diálogo aberto coa Fegamp, incremente a achega autonómica en favor dos concellos para o sostemento dos servizos municipais de axuda no fogar (SAF) e reclame ao Goberno de España o financiamento do 50% do previsto na Lei de dependencia, desde a súa entrada en vigor, así como a modificación dos baremos da dependencia e que calquera modificación legal que estableza o Estado veña acompañada do financiamento estatal preciso.



Proposta de resolución nº 12

MENORES NON ACOMPAÑADOS

O Parlamento de Galicia insta á Xunta de Galicia a exixir á Administración central que garanta que calquera traslado de menores migrantes estea baseado en criterios obxectivos e equitativos, teña en conta a capacidade de acollida e opinión das distintas comunidades autónomas, se faga cunha planificación axeitada, veña dotado do financiamento estatal preciso para ofrecer os mellores recursos, atención e acollida e respecte o interese superior dos menores, segundo o establecido na Convención de Dereitos do Nenos.



Proposta de resolución nº 13

CIM MÓBILES + VIOLENCIA DE XÉNERO

O Parlamento de Galicia insta á Xunta de Galicia a poñer en funcionamento recursos móbiles específicos para achegar servizos de información, asesoramento e acompañamento ás mulleres en localidades de ámbito rural e nas universidades galegas. Asemade, solicita ao Goberno central a que cumpra co Pacto de Estado Contra a Violencia de Xénero, elaborando unha lei estatal contra a trata para poder garantir a protección e os dereitos das vítimas, e que asuma o gasto do custe de funcionamento dos centros de crise 24 horas para vítimas de violencia sexual creados a partir da lei do “Solo si é si”.



Proposta de resolución nº14

RESIDENCIAS DE MAIORES

O Parlamento de Galicia insta á Xunta de Galicia a que, dentro do novo modelo de atención e coidados ás persoas maiores, desenvolva un plan específico para incrementar a rede de centros residenciais na nosa Comunidade, que aumente as prazas públicas e achegue servizos a territorios que máis o precisan.



Proposta de resolución nº 15

IMPULSO INDUSTRIAL

O Parlamento de Galicia insta ao Goberno galego a continuar favorecendo políticas dirixidas ao impulso industrial na nosa comunidade, sempre que cumpran a normativa ambiental vixente tanto autonómica, como estatal e europea, e rexeitar que posturas de negacionismo industrial se instalen na nosa comunidade. Entre as actuacións a executar, dirixirse ao Goberno de España para que impulse as medidas necesarias que permitan garantir que os proxectos industriais estratéxicos de Galicia dispoñan das infraestruturas eléctricas e das axudas necesarias para a súa viabilidade e implantación no noso territorio, ofrecendo unha resposta áxil e axustada á realidade do tecido produtivo galego e facilitando a asignación dos fondos destinados aos PERTEs en igualdade de condicións que outras comunidades autónomas, procurando un diálogo e colaboración permanente coa Administración Autonómica.



Proposta de resolución nº 16

FONDOS EUROPEOS INDUSTRIA

O Parlamento de Galicia insta á Xunta de Galicia a reiterar ao Goberno de España a necesidade de transferir ás Comunidades Autónomas a xestión directa dos fondos europeos de recuperación, en particular, os do ámbito industrial, en cumprimento dos reiterados acordos do Parlamento galego, garantindo que Galicia reciba os fondos europeos proporcionais ao seu peso económico, para a súa xestión no ámbito autonómico; ou subsidiariamente, a implantar, xunto coas Comunidades Autónomas, un sistema de cooperación e cogobernanza para a xestión dos fondos dispoñibles dos PERTE da industria, co fin de garantir un apoio máis áxil, eficaz, obxectivo e transparente dirixido ás empresas nos procesos de recuperación e transformación económica, asegurando os fondos industriais comprometidos polo presidente Sánchez aos proxectos avalados tecnicamente polos servizos públicos e, especialmente, aqueles que teñan máis madurez e avances na súa tramitación.



Proposta de resolución nº 17

ENERXÍAS RENOVABLES

O Parlamento de Galicia insta ao Goberno galego a dirixirse ao Goberno de España para que impulse as medidas necesarias que permitan manter a posición de liderado de Galicia nas enerxías renovables, nomeadamente desenvolvendo as infraestruturas eléctricas da rede de transporte ou distribución para a evacuación dos novos proxectos en marcha, garantindo que o hidroxenoduto A Coruña-Zamora non sofre retraso ningún con respecto aos que foron declarados como Proxectos de Interese Común no ano 2024 e promovendo un desenvolvemento ordenado da eólica mariña que sexa compatible co medio mariño e as actividades do sector pesqueiro, a través do apoio á plataforma experimental de eólica mariña de Punta Langosteira como instrumento para a adquisición de coñecemento acerca da eólica mariña flotante e a convocatoria das poxas de eólica mariña coas máximas garantías e incluíndo a Galicia.



Proposta de resolución nº 18

MATERIAS PRIMAS

O Parlamento de Galicia insta á Xunta de Galicia a recoñecer a importancia de aumentar e diversificar a subministración de materias primas fundamentais e das materias primas estratéxicas, co fin de reforzar a autonomía estratéxica, reducir a dependencia do exterior e asegurar unha subministración segura e sostible de materias primas esenciais para as transicións verde e dixital.



Proposta de resolución nº 19

SOLO EMPRESARIAL

O Parlamento de Galicia insta ao Goberno galego a adoptar medidas para o abaratamento do solo empresarial cuxa titularidade corresponda á sociedade Xestión do Solo de Galicia – Xestur.



Proposta de resolución nº 20

FINANCIAMENTO AUTONÓMICO

O Parlamento de Galicia insta a Xunta de Galicia a demandar do Goberno de España a urxente convocatoria do Consello de Política Fiscal e Financeira, onde se aborde a reforma do modelo de financiamento autonómico, no que Galicia traballará a prol de avanzar no autogoberno económico e financeiro para blindar o autogoberno e garantir uns servizos públicos de calidade e as necesidades de transformación económica, defendendo un financiamento xusto para Galicia, mellorando a proposta actual de poboación axustada e para defender a ponderación adecuada dos sobrecustos que a dispersión e o envellecemento implican na prestación dos servizos públicos galegos, así como doutros factores que condicionan o desenvolvemento socioeconómico galego. Así mesmo, defenderase a valoración dun modelo xusto de financiamento local que supere a discriminación histórica dos concellos galegos e, no caso de condonación ás comunidades que se adherisen ao FLA, que se compense equitativamente as comunidades que non o fixeron.



Proposta de resolución nº 21

IMPOSTOS

O Parlamento de Galicia insta á Xunta de Galicia a seguir avanzando en alivios fiscais, incluíndo nos Orzamentos de 2026 novas rebaixas fiscais.



Proposta de resolución nº 22

CIBERSEGURIDADE

O Parlamento de Galicia insta á Xunta de Galicia a solicite ao Goberno do España a localizar o futuro Centro Nacional de Ciberseguridade en Galicia, tendo en conta a existencia en Galicia dun sólido ecosistema empresarial e de formación e investigación en materia de ciberseguridade, así como a próxima posta en marcha en 2026 do Centro de Ciberseguridade de Galicia en Ourense, instalacións que poderían acoller tamén este, o que ademais contribuiría a un desenvolvemento máis equilibrado do país, á cohesión territorial e á redución da brecha dixital entre rexións.



Proposta de resolución nº 23

REHABILITACIÓN VIVENDAS BALEIRAS

O Parlamento de Galicia insta a Xunta de Galicia a reforzar as medidas que promovan a oferta de vivenda mediante apoios á rehabilitación de vivendas baleiras de particulares con destino ao mercado de alugueiro, a través de axudas directas do IGVS ao propietario.



Proposta de resolución nº 24

CESIÓN INMOBLES SAREB

O Parlamento de Galicia insta á Xunta de Galicia a solicitar ao Goberno central a cesión dos inmobles baleiros das localidades de Galicia onde existe maior demanda acreditada de vivenda propiedade da SAREB, así como solo da súa propiedade, e a inclusión da Comunidade Autónoma de Galicia dentro das subvencións directas que concede o Ministerio de Vivenda e Axenda Urbana para o incremento do parque público de vivendas, como fai con Cataluña.



Proposta de resolución nº 25

AP-9

O Parlamento de Galicia insta á Xunta de Galicia a reclamar ao Goberno de España o rescate da concesión da AP-9, tendo en conta que o seu custo sería equiparable ao das subvencións a futuro das peaxes, así como a transferencia da súa xestión completa. Solicitarase, asemade, transparencia e diálogo coa Comunidade Autónoma en relación cos diferentes aspectos da xestión da AP-9: asunción inmediata do pago completo por parte do Estado da peaxe en sombra en Rande e A Barcala, e información ao respecto do procedemento que se segue nas institucións da Unión Europea acerca das prórrogas da concesións.



Proposta de resolución nº 26

ESTRADAS

O Parlamento de Galicia insta á Xunta de Galicia a seguir facilitando a mobilidade por estrada na comunidade autónoma, mantendo a liña de traballo que vén desenvolvendo nos últimos anos de estender a rede viaria de alta capacidade, limitar a contía das peaxes, ofrecer descontos das tarifas nas autoestradas autonómicas e levar a cabo un constante mantemento da súa rede viaria. Asemade, reclamará ao Goberno de España unha planificación das actuacións necesarias para cumprir os seus compromisos en materia viaria, coa construción das autovías estatais pendentes (A-74 Autovía da Mariña, A-56 Lugo – Ourense, A-76 Ponferrada – Ourense), actuacións en contornas urbanas (como o Vial 18, a Cuarta Rolda de Coruña, a Variante Norte de Ourense), o diálogo con concellos e veciños para obter solucións de consenso en trazados como a circunvalación de Pontevedra (A-57) ou a prolongación da A-52 en Vigo e Mos, o impulso de variantes esquecidas (como a da Estrada ou a de Pontearreas) e a mellora da seguridade viaria no conxunto na súa rede viaria en Galicia, con casos que preocupan como a N-120 tanto en Ourense como en Pontevedra, ou a N-541 que motivou o denominado Pacto de Pedre.



Proposta de resolución nº 27

ATENCIÓN PACIENTES CRÓNICOS

O Parlamento de Galicia insta a Xunta de Galicia a aprobar un Plan para a atención do paciente crónico complexo e avanzado desde un enfoque sociosanitario integral para mellorar a calidade de vida dos doentes, con independencia de que vivan en residencias ou no seu domicilio.



Proposta de resolución nº 28

CALENDARIO VACINAL

O Parlamento de Galicia insta a Xunta de Galicia a ampliar, neste ano 2025 e de acordo coas necesidades clínicas, o calendario vacinal dos grupos de poboación máis vulnerables, como son os nenos, os mozos e os maiores.



Proposta de resolución nº 29

SAÚDE MENTAL

O Parlamento de Galicia insta a Xunta de Galicia a reforzar e mellorar a atención á saúde mental, tendo en conta o aumento da demanda asistencial que se está a rexistrar, coa aprobación dun novo Plan de Saúde Mental que incluírá a creación dunha rede de psicoloxía de atención primaria dependente dos servizos de Psiquiatría das áreas sanitarias, así como coa dotación de novas prazas en centros residenciais e de rehabilitación para estes pacientes.



Proposta de resolución nº 30

FALTA DE PROFESIONAIS SANITARIOS

O Parlamento de Galicia insta a Xunta de Galicia a dirixirse ao Goberno de España para reclamarlle de forma urxente a axilización do proceso de homologación de títulos dos profesionais sanitarios; a modificación do Estatuto Marco para, entre outras necesidades e de forma dialogada, elevar a idade máxima para o exercicio da profesión médica aos 72 anos; acelerar a implantación da especialidade de médico de urxencias; incorporar á oferta formativa de especialistas as novas prazas acreditadas; e a adopción de medidas que permitan incentivar as prazas consideradas como de difícil cobertura, todo co obxectivo de paliar o déficit de profesionais de determinadas especialidades que sofre todo o sistema nacional de saúde.



Proposta de resolución nº 31

PACTO POLA LINGUA

O Parlamento de Galicia insta á Xunta de Galicia a impulsar un Pacto pola lingua, que emerxa do consenso político e social e que cristalice nunha renovación do Plan xeral de normalización da lingua galega, ademais do impulso de novas medidas que promovan un maior uso do galego en todos os ámbitos sociais. De xeito paralelo, reclamarase ao Goberno central un maior compromiso para o financiamento destinado ás políticas de promoción das linguas cooficiais e o seu reparto con criterios adecuados aos fins que se deben perseguir, asegurando un equilibrio no reparto deses fondos para o que se regulará que ningunha CCAA reciba máis do 40% do total do fondo que se trate.



Proposta de resolución nº 32

XUVENTUDE: VIVENDA E EMPREGO

O Parlamento de Galicia insta á Xunta de Galicia a que siga apoiando á mocidade para poder desenvolver os seus proxectos vitais. No ámbito da vivenda, ampliando o orzamento destinado ao Bono Emancípate, logo do éxito acadado na primeira convocatoria; tamén coa reserva para eles dun 40% das novas vivendas en alugueiro e un 25% das vivendas en venda que se constrúan na Lexislatura, aloxamentos compartidos, o Bono alugueiro mozo, axudas directas á compra de vivenda e avais para sufragar a primeira compra de vivenda con hipoteca, entre outras medidas. En paralelo, no ámbito do emprego, implementárase unha estratexia para impulsar as oportunidades laborais da mocidade galega co fin de avanzar na retención e captación de talento mozo, buscando acadar un mercado de traballo dinámico e inclusivo.

Asemade, instárase ao Goberno de España a crear un Pacto de Estado polo Futuro da Mocidade, que articule un plan de acción conxunto coas comunidades autónomas centrado en tres eixos fundamentais: Emprego xuvenil, vivenda e formación.



Proposta de resolución nº 33

ESTRATEGIA RETORNA

O Parlamento de Galicia insta ao Goberno galego ao máximo desenvolvemento da Estratexia Galicia Retorna 2023-2026, co fin de seguir a promover a chegada de persoas de alta cualificación académica e profesional á nosa comunidade, así como que solicite ao Goberno de España que tome as medidas necesarias para contribuír a este obxectivo: axilizando o procedemento de homologación de títulos universitarios obtidos no exterior e as concesións de permisos de residencia e traballo dos cónxuxes e descendentes sen nacionalidade dos españois retornados, dotando de financiación axeitada ás comunidades autónomas que realmente están desenvolvendo programas efectivos de retorno, mellorando os niveis de atención nos servizos consulares do Estado para axilizar os trámites ordinarios necesarios para o retorno, eliminando as desigualdades coas que a lexislación fiscal estatal grava aos emigrantes e aos retornados e introducindo plans estatais específicos de acceso á vivenda para familias retornadas (tanto para a compra como para o alugueiro).



Proposta de resolución nº 34

ARANCEIS – VIÑO

O Parlamento de Galicia insta ao Goberno galego a solicitar ao Goberno de España que apoie ao sector agrario e outros posibles sectores afectados ante o novo contexto arancelario, dirixíndose ás autoridades europeas para establecer plans específicos, con dotación económica suficiente, que inclúan medidas de promoción en terceiros países, alternativas de xestión dos excedentes que poidan producirse e axudas aos produtores que vexan significativamente afectadas as súas exportacións, nomeadamente en favor do sector vitivinícola de gran relevancia en Galicia. Tamén para que procure unha redacción do texto da nova Lei de Agricultura Familiar que teña en conta a realidade de territorios como Galicia, onde a base territorial destas explotacións familiares consta de multitude de pequenas parcelas, de maneira que se simplifique a tramitación da solicitude única da PAC para este tipo de explotacións.



Proposta de resolución nº 35

PESCA NA UE E ACORDO CON TAILANDIA

O Parlamento de Galicia insta a Xunta de Galicia a dirixirse ao Goberno de España para que solicite ante a Unión Europea a participación das administracións das rexións altamente dependentes da pesca, como a galega, no proceso de toma de decisións xunto con todos os Estados membros, co obxectivo de contar cunha regulación máis xusta. No entanto, instaralle para que defenda ante a Comisión Europea a exclusión total do atún do Acordo de Libre Comercio entre a UE e Tailandia, así como o establecemento de normas sólidas e equitativas que garantan a igualdade de condicións (*level playing field*) e que eviten a competencia desleal en todos os produtos pesqueiros.



Proposta de resolución nº 36

BONO PEIXE E IVE

O Parlamento de Galicia insta a Xunta de Galicia a fomentar hábitos de vida saudable, garantir unha alimentación sostible e promover a compra de peixe e marisco fresco nas peixarías situadas en Galicia, axudando á cidadanía mediante o Bono Peixe. Asemade, para redundar nestes obxectivos, dirixirse ao Goberno central para que considere como alimentos básicos os produtos do mar, a carne e as súas conservas, de xeito que lles aplique o tipo de IVE súper-reducido do 4% como medida de apoio para as familias con rendas baixas ou en situación de vulnerabilidade, para fomentar o consumo saudable e como iniciativa de apoio tamén a estes sectores.



Proposta de resolución nº 37

CONDENA TOTALITARISMOS

O Parlamento de Galicia acorda subscribir a Resolución do Parlamento europeo do 19 de setembro de 2019 de condena dos totalitarismos nazi e comunista. Asemade, insta á Xunta de Galicia a dirixirse ao Goberno de España para que adopte todas as medidas contempladas nas declaracións da citada Resolución do Parlamento europeo mediante a súa incorporación á lexislación vixente española.



Proposta de resolución nº 38

ALCOA

O Parlamento de Galicia insta á Xunta de Galicia a seguir traballando xunto co resto das Administracións e as empresas Alcoa e Ignis para asegurar o futuro da factoría de alúmina e aluminio de San Cibrao, a continuidade da súa actividade e o mantemento dos postos de traballo. Asemade, dirixirse ao Goberno de España para axilizar a autorización dos proxectos de parques de xeración de enerxía renovable destinados a subministrar enerxía limpa e a prezo estable e competitivo á factoría da Mariña Lucense; reclamar a convocatoria periódica da Mesa de Seguimento entre administracións, empresa e representantes das persoas traballadoras e desenvolver as medidas de apoio ás industrias electrointensivas mediante o Estatuto do Consumidor e as aportacións por compensación de CO2 e outros apoios destinados a promover a modernización e competitividade deste complexo industrial.



Proposta de resolución nº 39

ORZAMENTOS DO ESTADO

O Parlamento de Galicia insta a Xunta de Galicia a demandar do Goberno de España que cumpra co seu deber constitucional de presentar ante as Cortes Xerais o proxecto de lei de Orzamentos Xerais do Estado, xa que esta inacción, reiterada e sistemática, compromete a execución de políticas públicas e transmite inestabilidade institucional.



Proposta de resolución nº 40

PRESIDENTE DA CONFEDERACIÓN HIDROGRÁFICA MIÑO-SIL

O Parlamento de Galicia insta á Xunta de Galicia a demandar do Goberno de España as modificacións legislativas necesarias para que o presidente da Confederación Hidrográfica Miño-Sil sexa nomeado e separado a proposta da Xunta de Galicia, a fin de garantir unha xestión mais coordinada e eficiente das concas fluviais que discorren por Galicia.

Asinado dixitalmente por:

Alberto Pazos Couñago na data 24/04/2025 10:25:59

